



**REPUBLIKA E SHQIPËRISË
KËSHILLI I MINISTRAVE**

VENDIM

Nr. 96, datë 03.02.2008

**PËR AKTIVET NË MBULIM TË PROVIGJONEVE TEKNIKE DHE MATEMATIKE, DHE
INVESTIMET E TYRE NGA SHOQËRITË E SIGURIMEVE**

Në mbështetje të nenit 100 të Kushtetutës dhe të pikës 2 të nenit 105 të ligjit nr.9267, datë 29.7.2004 “Për veprimtarinë e sigurimit, të risigurimit dhe të ndërmjetësimit në sigurime dhe risigurime”, me propozimin e Ministrit të Financave, Këshilli i Ministrave

VENDOSI:

1. Ky vendim ka për qëllim të përcaktojë:

a) kategoritë e investimeve të aktiveve në mbulim të provigjoneve teknike e matematike;

b) kufijtë maksimalë të lejueshëm të investimit të aktiveve në mbulim të provigjoneve teknike e matematike;

1 Shoqëritë e sigurimit janë të detyruara të mbajnë aktive në mbulim të provigjoneve teknike dhe matematike, jo më pak se vlera bruto e provigjoneve teknike. Aktivët në mbulim të provigjoneve teknike dhe matematike duhet të jenë të kategorizuara dhe të shpërndara në mënyrë, që të mos jenë të lidhura me një lloj të vetëm aktivi apo enti si dhe të mos jenë të lidhura me detyrime të tjera, përveç atyre që rrjedhin nga kontratat e sigurimit.

2 Shoqëritë e sigurimeve të mbulojnë provigjonet e tyre teknike dhe matematike vetëm me kategoritë e aktiveve, të përcaktuara si më poshtë:

a) bono thesari, obligacione, instrumente të tregut të parasë e të kapitalit, që krijohen apo vërtetojnë borxhin, e emetuar dhe të garantuar, nga organet e qeverisjes qendrore në Republikën e Shqipërisë. Me kërkesë të vecantë të shoqërisë dhe me miratim të Autoritetit, shoqëritë e sigurimit mund të investojnë në instrumentat e lartpërmendur të vendeve anëtare të BE-se, SHBA, Japoni si dhe letra borxhi të garantuara nga organizata ndërkombëtare ku Republika e Shqipërisë bën pjesë;

- b) të tjera letra me vlerë, letra borxhi me të ardhura fikse e të ardhura të ndryshueshme, të tregtuara në një treg të rregulluar;
- c) aksione në fonde investimesh, brenda territorit të RSH;
- d) aksione si pjesë të kapitalit të një shoqërie tregtare, të listuar në një treg të rregulluar ligjërisht brenda territorit të Republikës së Shqipërisë;
- e) aksione në shoqëri sigurimi dhe shoqëri risigurimi, vetëm me miratim të Autoritetit;
- f) toka, ndërtesa dhe të drejta mbi pasuri të patundshme në Republikën e Shqipërisë;
- g) kredi individuale hipotekore për apartamente banimi vetëm për punonjësit e shoqërisë së sigurimit;
- h) çertifikata depozitash dhe letra të tjera me vlerë, të lëshuara nga banka të licensuara nga Banka e Shqipërisë;
- i) para dhe ekuivalentë të saj (të cilat përfaqësojnë mjete monetare në arkë, mjete monetare në bankë dhe depozita me afat maturimi më të vogël se 3 muaj), në banka të licensuara nga Banka e Shqipërisë, me seli në Republikën e Shqipërisë;
- j) shumat që detyrohen nga risiguresit, që nuk janë pezull më shumë se një vit nga lindja e detyrimit.
- k) pjesën e risiguresit në provigjonet teknike;
- l) depozita me shoqëri ceduese dhe borxhe të zotëruara nga ato;
- m) shuma, që detyrohen nga policmbajtësit dhe ndërmjetësit, e që rrjedhin nga veprimtaria e sigurimeve të drejtpërdrejta dhe risiguresive, n.q.s nga dita e detyrimit të pagesës nuk kanë kaluar më shumë se 3 muaj, por jo me shume se 20 % e provigjonit të primit të pafitur;
- n) kërkesëpagesa, që rrjedhin nga pjesët e shpëtuara dhe subrogimet, të cilat nuk janë pezull më shumë se 1 vit;
- o) interesa dhe qera të maturuara, të ardhura të tjera të maturuara dhe shpenzime të parapaguara;
- p) aktive të qendrueshme të trupëzuara, përveç atyre të parashikuara në shkronjën "f" të pikës 3 të kësaj VKM, të vlerësuar në bazë të normave të amortizimit;

Nuk do të konsiderohen aktive në mbulim të provigjoneve teknike për shoqërinë e sigurimit:

- a) Aktivitet që shërbejnë për financimin e kapitaleve të veta të një shoqërie sigurimi, apo të një subjekti tjetër që është objekt kufizimesh rregullative nga një Autoritet Mbikëqyrës, brenda të njëjtit grup kapitali.
- b) Letrat me vlerë të shoqërive të cilat janë filiale, shoqëri mbështetëse, aksionerë, në shoqërinë e sigurimit apo çdo rast tjetër që konsiderohet si palë e lidhur me shoqërinë e sigurimit;

4. Shoqëritë e sigurimit, përsa i përket aktiveve dhe investimeve të aktiveve, në mbulim të provigjoneve teknike dhe matematike, mund të investojnë jo më shumë se:

- a) 40 për qind të provigjoneve teknike dhe matematike bruto në letra me vlerë të listuara si dhe letra me vlerë të tregëtuara në një treg të rregulluar dhe pjesëmarrje në fonde investimesh, apo në skemat e investimeve kolektive;
- b) 20 për qind të provigjoneve teknike dhe matematike bruto në Toka dhe Ndërtesa, përfshirë 10 për qind në çdo pjesë toke a ndërtese ose në një numër pjesësh toke apo ndërtesash, afër njëra tjetrës, sa mund të vlerësohen efektivisht një investim;
- c) 5 për qind të provigjoneve teknike dhe matematike bruto në aksione dhe letra të tjera me vlerë të listuara në një treg të licensuar letrash me vlerë, si: aksione, obligacione dhe instrumente të tjera të tregut të parasë dhe kapitalit të së njëjtës sipërmarrje apo hua, dhënë të njëjtit huamarrës. Ky kufi mund të ngrihet në 10 për qind nëse sipërmarrja nuk investon më shumë se 40 për qind të provigjoneve teknike bruto në hua ose letra me vlerë të institucioneve emetuese a huamarrëse, ku në secilën prej tyre ka investuar më shumë se 5 për qind të aktiveve të veta;
- d) 10 për qind të provigjoneve teknike dhe matematike bruto në, letra borxhi, obligacione të garantuara me aktive dhe në aksione që nuk janë të listuara, si dhe të tjera letra me vlerë me të ardhura fikse apo të ndryshueshme, me kusht që investimi i shoqërisë së sigurimit në një subjekt që emeton këto letra me vlerë nuk tejkalon 10 për qind të kapitalit të këtij të fundit;
- e) 5 për qind të provigjoneve teknike dhe matematike bruto në hua të pasiguruara, përfshirë 1 për qind për çdo hua të vetme;
- f) 25 % e vlerës së provigjoneve teknike dhe matematike në shuma që detyrohen nga cesorët, risiguruesit, si dhe pjesa e risiguruesit në provigjonet teknike, në përputhje dhe me pikën 3 (j). Bëjnë përjashtim nga ky kufizim risiguruesit që janë të klasifikuar si BBB- e më lartë nga Standart & Poor;
- g) 3 për qind të provigjoneve teknike bruto në formën e parasë dhe ekuivalentëve të saj;
- h) 5 për qind të provigjoneve teknike bruto në aktive të qëndrueshme të trupëzuara, të ndryshme nga ato të përcaktuara në pikën b);

- i) 15 për qind të provigjoneve teknike bruto për kreditë hipotekore, sipas përcaktimit të pikës 3, shkronja g, përfshirë 5 për qind të provigjoneve teknike neto për çdo hua të vetme;
- j) 2 për qind të provigjoneve teknike bruto në kërkesëpagesa që rrjedhin nga pjesët e shpëtuarra dhe subrogimet, përfshirë 1 për qind për çdo vlerë individuale, në përputhje me shkronjën n) të pikës 3;
- k) 20 për qind të provigjoneve teknike bruto në depozita me shoqëri ceduese dhe borxhe të zotëruara nga ato;
- l) 5 për qind të provigjoneve teknike bruto në interesa të llogaritur, qira të pagueshme dhe shpenzime te parapaguara;

1 Shoqëritë e sigurimit të cilat janë të licensuara përpara hyrjes në fuqi të këtij vendimi, të përshtasin aktivet në mbulim të provigjoneve teknike e matematike dhe kufijtë e investimit të tyre brenda datës 31.03.2008. Për përshtatjen e aktiveve sipas pikës 4 (b) të këtij vendimi, vetëm për periudhën nga hyrja në fuqi e vendimit deri në 30.06.2008, zbatohet kufiri i sipërm në masën 30% të provigjoneve teknike bruto.

2 Vendimi i Këshillit të Ministrave nr. 268, datë 28.4.2005 “Për përcaktimin e kufijve maksimalë të lejueshëm për aktivet dhe investimet e aktiveve, për mbulimin e provigjoneve teknike dhe matematike, nga shoqëritë e sigurimeve”, shfuqizohet;

3 Ky vendim hyn në fuqi pas botimit në Fletoren Zyrtare.

K R Y E M I N I S T R I
SALI BERISHA